

佛說鴛崛鬘經

西晉沙門法炬譯



南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛說鴛崛鬘經

聞如是：一時，婆伽婆在舍衛城祇樹給孤獨園。

爾時，眾多比丘，到時，著衣持鉢，入舍衛城乞食。

時，眾多比丘入舍衛城乞食，聞「王波斯匿宮門外有眾多人民，各携手啼哭喚呼，便作是說：『於此國土，有大惡賊名鴛崛鬘，殺害人民，暴虐無慈心。村落居止，不得寧息。城廓，亦不得寧息。人民，亦不得寧息。殺害人民，各

取一指，用作花鬘。以是故，名曰鴛崛鬘。願王當降伏此人。』」

時，眾多比丘，從舍衛城乞食已，過食後，攝衣鉢，澡手洗足，以尼師檀著肩上，詣世尊所，頭面禮足，在一面坐。

時，諸比丘白世尊言：我等眾多比丘，到時，著衣持鉢，入舍衛城乞食。便聞在拘娑羅王宮門外，有眾多人民携手啼哭，便作是說：「今境界中，有大賊名鴛崛鬘，殺害人民，各取一指，用作花鬘。以是故，名曰鴛崛鬘，願王當降伏彼人。』」

時，世尊從比丘聞，即從座起。若鴛崛鬘居止處，世尊便往彼所。

時，有眾人擔薪負草及耕田人，有行路人，詣世尊所，語世尊言：沙門！莫從此道行。所以然者，此道中有鴛崛鬘，殺害人民，無有慈心於眾生。城廓村

落，皆為彼人所害。彼殺人以指作花鬘。觸嬈世尊，諸有沙門人民之類，從此道行者，十人共集，然後得過。或二十人、或三十人、或四十人、或五十人、或百人、或千人，然後得過。彼鴛崛鬘，從意所欲，皆取殺之。

時，世尊遂更前行，無退轉意。

時，鴛崛鬘遙見世尊來。見已，便作是念：諸有人民，欲來過此道者，十人共集，至或千人，然後得過。隨意所欲，而殺害之。然，此沙門獨來無伴，我今當取殺之。

時，鴛崛鬘即拔腰劍，往至世尊所。

時，世尊遙見鴛崛鬘來，便復道還。

時，鴛崛鬘走逐世尊，盡其力勢，欲及世尊，然不能及。

時，鴛崛鬘便作是念：我走能逮象、亦能及馬、亦能及車、亦能及暴惡牛、亦能及人。然，此沙門行亦不疾。然，盡其力勢，不能及。

時，鴛崛鬘遙語世尊言：住！住！沙門！

世尊告曰：我久自住，然汝不住。

時，鴛崛鬘便說此偈：

沙門行言住 謂我言不住 沙門說此義 自住我不住

爾時，世尊語鴛崛鬘言：汝聽我所說「我住，汝不住義。」

時，便說偈言：

世尊常自住 一切蒙其恩 汝自殺害心 亦不避惡行

爾時，鴛崛鬘便作是念：我今作惡行耶？

時，鴛崛鬘便說偈言：

於我發慈心 沙門說此偈 即時捨腰劍 五體歸命佛

頭面而禮足 求為作沙門 佛言來比丘 即受具足戒

諸佛世尊常法，如諸佛世尊作是言：「善來！比丘！」

即時，鬚髮自墮，猶如剃頭經七日中。若彼所著袈裟，極妙細滑。若施布劫貝育越衣，則化成袈裟。

世尊作是說已：善來！比丘！當修梵行於我法中，無憍慢意，當盡苦源本。

時，鴛崛鬘鬚髮自墮，身著袈裟，在世尊後。

時，世尊將鴛崛鬘在後行，從闍梨園詣祇洹，便就座坐。

時，鴛崛鬘為諸尊長比丘所教訓威儀禮節。作是教訓已，所以族姓子，以信

堅固出家學道修無上梵行，盡生死源，梵行已立，所作已辦，更不復受母胎。
時，鴛崛鬘成阿羅漢。

時，尊者鴛崛鬘修阿練若，行無人之處。常乞食，不選擇家。著五納衣，人所不利。

時，王波斯匿集四部兵，集四部兵已，出舍衛城，欲往殺賊鴛崛鬘。

時，波斯匿王便作是念：可先往至世尊所，以此義具向世尊說。若世尊教勅者，我當奉行。

時，波斯匿王詣祇洹，步行至世尊所。

夫，剎利王種有五相。云何為五？謂：蓋、天冠、朱拂柄、劍寶、履屣，盡捨著一面。頭面禮足，在一面坐。

時，波斯匿王坐已。世尊問曰：王何故集四部兵，塵土衲衣，來至我所？

時，波斯匿王白世尊言：於此舍衛城有賊名鴛崛鬘，殺害人民，無有慈心。城廓村落，皆厭患之，人民分離。彼殺害人民已，而取其指用作花鬘。欲往殺彼人。

世尊告曰：若今王見鴛崛鬘剃除鬚髮著三法衣，以信堅固，出家學道。王欲取云何？

王報言：當取何為？當問訊禮敬，承事供養，無有害心向。然，世尊！彼兇惡人，無有慈心於眾生類，能修沙門行耶？

時，尊者鴛崛鬘，去世尊不遠，結跏趺坐，直身正意，繫念在前。

時，世尊舉右手示鴛崛鬘處：大王！此是賊鴛崛鬘。

時，波斯匿王見鴛崛鬘已，便懷恐怖，衣毛皆豎。

時，世尊告王波斯匿言：大王！勿懷恐怖。自到彼所，自當與王語。

時，波斯匿王便往至鴛崛鬘所。到已，頭面禮足，在一面立。

時，波斯匿王問鴛崛鬘言：尊者鴛崛鬘，今名何等？

鴛崛鬘答言：大王！我名伽瞿，母名曼多耶尼。

王報言：汝善自勉進，我今盡形壽供養尊者伽瞿，衣被、飯食、病瘦醫藥、床臥具，無所吝惜，常當以法擁護。

時，波斯匿王頭面禮足繞三匝。詣世尊所，頭面禮足，在一面坐。

時，波斯匿王白世尊言：世尊，不降伏者能降伏之。如來皆使剛強者降伏，乃能不加刀杖降伏眾生。我有眾多事，欲還國。

世尊告曰：今正是時，隨意所欲。

時，波斯匿王即從座起，頭面禮足，繞三匝，便退而去。

時，鴛崛鬘，即其日，著衣持鉢，入舍衛城乞食。

時，鴛崛鬘乞食時，見一女人懷妊欲產，未得時產。見已，便作是念：此眾生甚為苦惱。

時，鴛崛鬘入舍衛城乞食，食後攝衣鉢，澡手洗足，以尼師檀著肩上，便至世尊所，頭面禮足，在一面坐。

時，指鬘白世尊言：我向者著衣持鉢，入舍衛城乞食。乞食時，見一女人懷妊欲產，然不得時產。見已，我便作是念：「此眾生類，甚為苦惱。」

世尊告曰：汝，指鬘！往彼女人所，便語彼女人言：「諸聖所告，我從聖生

以來，不自憶殺害眾生生命。以至誠語，使彼女人安隱得產。」

爾時，指鬢白世尊言：此非於彼，我有妄語耶？所以然者，我於此身，殺害無數百千眾生。

世尊告曰：汝處俗時。今處聖時，不與本同。

汝指鬢入舍衛城，於街巷作是唱令：「諸賢當護五事。以何為五？不殺生、不與取、不婬、不妄語、不飲酒。所以然者，殺生之報，以刀施得刀報，盜報增益貧窮、婬報妻婦增益姦邪、妄語報眾生口氣臭穢、飲酒報增益眾亂。」

往彼女人所，到已，語彼女人言：「我從聖生以來，未曾憶殺害眾生。以是真誠語，使女人安隱得產。」

對曰：如是，世尊！

時，指鬘到時著衣持鉢，入舍衛城乞食。於街巷作是唱令：諸賢當護五事。至女人安隱得產。

漸往至彼女人所。到已，語女人言：「我自從聖生，不自憶殺害一人命。以是真誠語，使女人安隱得產。

時，指鬘說是語適竟，彼女人即得產。

時，指鬘食後，欲出舍衛城。

有一人，以石打指鬘身。復有一人，以杖打指鬘身。復有一人，以刀斫指鬘身體破。

時，指鬘頭破身血，出舍衛城，到世尊所。

時，世尊遙見指鬘來，頭破血流，污僧伽梨，身體破。見已語言：忍！勿發

惡意。此之行報，無數百千劫當入地獄中。今所受報，亦不足言。

時，指鬘白言：如是，世尊！如是，如來！

時，指鬘以和悅心，即於佛前，說此偈言：

我忍甚堅固	無有增減心	我今聞正法	是故不懈慢
聞法亦堅固	好信佛法僧	親近善知識	諸能分別法
我曾為惡賊	名曰鴛崛鬘	為水所漂溺	
自歸命三佛	當歸自歸命	於法分別法	
已得三達智	逮得佛迹處		
本為放逸行	殺害眾生命	今名至誠諦	不復殺害人
身口之所行	意亦無所害	彼名為殺者	不為人所嫉

夫年少比丘 亦應佛戒律 此明照世間 如月雲霧消
前為婬逸行 後改不復犯 此明照世間 如月雲霧消
為水所漂沒 亦如被練剛 巧匠解木理 智者自修身
或以加刀杖 或鞭韁鞞鞫 無力亦無持 為佛所降伏
亦不希望死 亦不希望生 自觀察時節 安詳不卒暴

爾時，世尊觀樂指鬘，便告諸比丘：汝等，頗見比丘中，如我弟子，有捷疾智，聞法便解，所謂伽瞿比丘聞法便解。

諸比丘言：不也，世尊！

爾時，世尊告諸比丘：我聲聞中第一比丘有捷疾智，所謂指鬘比丘是。

爾時，諸比丘聞佛所說，歡喜奉行。

佛說鴛崛鬘經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>